



## Latgališu kultūrys goda bolva BOŅUKS 2021

### NŪLYKUMS

Latgališu kultūrys goda bolva teik taiseita ar mierki apkūpuot loboukū, spylgtuokū i svareiguokū padareitū i nūtikšonys pārnejā godā latgaliskajā kulturā, gūdyņot aktīvuokūs latgališu kultūrys puorstuovus, popularizātuojus, kai ari veicyņot jaunradis i kultūrys daudzveideibys atteisteibu iz pīršku. “Boņuks 2021” tiks gūdyņotys tuos personeibys, nūtikšonys i aktivitatis, bez kuru vysa vaira nabyutu īsadūmojama latgaliskuo kultura 2021. godā.

#### Projekta ideja i mierki:

Veicyņot latgališu kulturvidis saglobuošonu i atteisteibu. Apkūpuot i gūdyņot spylgtuokūs i nūzeimeiguokūs sasnāgumus, nūtikšonys, personeibys latgališu kulturā pārnejā godā.

#### Bolvys reikuotuoji:

Latgolys viestnīceiba GORS

#### Nominaceju pretendenti:

Fiziskys voi juridiskys personys, kas sovā darbeibā i jaunradē sagloboj, atteista i popularizej latgališu kulturu, izmontoj latgališu volūdu i atbīst kaidai nu nūlykumā minātūs kategorieju. Bolva teik daškierta par spylgtu, kvalitatīvu, sabīdryski nūzeimeigu, sabīdreibys i profesionāļu atzineibu dabuojušu darbeibu voi jaunradi latgaliskuos kultūrys laukā 2021. godā. Pretendentam nav obligata praseiba byut raksteitam, radeitam voi kai cytaiž izapaudušam latgaliski, tys latgaliskuos vierteibys i latgaliskū kulturu var nest ari cytuos volūduos.

#### Pretendentu dasaceišona:

Nominantus latgališu kultūrys goda bolvai “Boņuks 2021” var īsnēgt da 2022. goda 10. janvara. Vīnu aktivitati, personeibu, nūtikšonu, dorbu var dasaceit vairuokuos kategoriejuos. Dasacejuma anketa daīmama kai elektroniskā, tai izdrukavojamā formatā bolvys sātyslopā <http://bonuks.lv> i Latgolys viestnīceibys GORS sātyslopā <http://latgalesgors.lv>. Vysūs dasacejumūs eipaši teik vārtāts padareitais latgaliskajā kulturā taišni konkretajā godā. Žureja īsoka īsnēgt izdavumus, gruomotys, dzīsmis, albumus, video, raidejumus i c., kas publiski pasaruodejuši da 2021. goda 26. decembra. Bolvys dasacejuma anketa teik pījimta ari drukavuotā formatā, dasacejumu syutūt pa postu (pošta štempeļs da 7. janvara): Latgališu kultūrys goda bolvai “Boņuks 2021”, Latgolys viestnīceiba GORS, Pīļs īla 4, Rēzekne, LV-4601.

#### Bolvys sajiemieji:

Bolva teik padūta 10 spylgtuokajom nūtikšonom, personeibom, aktivitatem voi cytom iniciativom pārnejā godā latgaliskajā kulturā kategoriejuos “Volūda. Literatura. Publicistika”, “Nūtikšonys. Aktivitatis. Personeibys” i “Audio. Video”. Vīna atseviška bolva bez īpīršk 10 nūsauktūs teik padūta nominacejā “Par myuža īguļdejumu latgališu kultūrys atteisteibā”.

**Pretendentu viertiešona:**

Bolvys žureja nu īsnāgtūs pretendentu, izvietējūt vysus saimētūs dasacejumus, atlasa vysmoz 30 bolvys nominantus, kurī teik izziņuoti 2022. goda janvara golā. Februara suokā žureja nu nominantu apstypriņoj desmit bolvys sajiemiejus, kurī teik paziņuoti bolvys ceremonejā 2022. goda 5. martā Latgolys viestnīceibā GORS. Bolvys "Par myuža īguļdejumu latgalīšu kulturys atteisteibā" sajiemiejs teik paziņouts vysmoz divejjs nedelis pyrma ceremonejys. Lāmumu par bolvys sajiemieju nominacejā "Par myuža īguļdejumu latgalīšu kulturys atteisteibā" pījem bolvys reikuotuoji, konsulteijūtīs ar bolvys žureju.

**Žureja:**

Bolvom dasaceitūs pretendentus vērtēs īprišk sataiseita komiseja, kurys vydā ir:

- dalinīki ir profesionalu pīredzi, dorbojūtīs kotrā nu kategoreju sferom;
- dalinīki, kurī ir zynomi, ar dorbim i pīredzi atzeiti vīdūkļu lideri latgaliskajā kulturā;
- bolvys reikuotuoju (Latgolys viestnīceibys GORS) puorstuovi;
- latgaliski raidūšūs i rokstūšūs medeju puorstuovi;
- īpriškejuos reizis latgalīšu kulturys goda bolvys "Boņuks" sajiemieji.

Kotrai nu bolvys kategoreju teik taiseits atškireigs komisejys sastuovs. Kūpā žurejā dorbojā vysmoz 30 komisejys dalinīki. Gadīnī, ka kaidis nu komisejys dalinīku ir saisteits ar kaidu nu kategoreju voi rūnās interešu konflikts, jis/jei napīsadola konkretuos kategorejys kandidata izvietiešonys procesā.

**Kategoreju skaidruojumi:**

"Volūda. Literatura. Publicistika"

Kategorejā var dasaceit pretendentus, kas atsafīc iz volūdys, literaturys, publicistikys laukim – kai latgaliski izdavumi, tai atseviški dorbi, aktivitatis, raidejumi, žurnalistikā padareitais, nu jauna sataiseitais, ari myusdīnu tehnologeju sferā latgaliski dareitais i c. Dasokūt bolvai gruomotys i cyta veida izdavumus, dasaceituoji apsajem bolvys žurejai īsnēgt gruomotys ci izdavuma eksemplaru elektroniskā i/ci drukavuotā formatā.

"Nūtikšonys. Aktivitatis. Personeibys"

Kategorejā var dasaceit pretendentus, kas nūtykuši, bejuši, darejuši dorbus latgaliskajā kulturā 2021. godā. Leluokys i mozuokys sabīdryskys i vaļstiskys nūtikšonys, pasuokumi, koncerti, teatra izruodis, muokslys pasuokumi i aktivitatis, akcejis, projekti, dareišonys internetā, ļauds – kulturys darbinīki, saiminīki, amatnīki, muokslinīki i cyti, kurūs dareitais 2021. godā eipaši gūdyņojams i pamets pādus latgaliskajā kulturā.

"Audio. Video"

Kategorejā var dasaceit audio i video dorbus muzykys, muokslys, kino, TV, interneta sferuos – vysu, kū var nūsavērt i/ci nūsaklauseit latgaliski i kas radeits, publicāts, viereibu dabuojs 2021. godā. Dasokūt bolvai konkretys dzīsmis, albumus ci video, dasaceituoji apsajem bolvys žurejai īsnēgt albuma, dzīsmis ci video verseju elektroniskā formatā.

**Viertiešonys kritereji:**

1. Cik latgaliskys i/voi Latgolys kulturys vierteibys nasūšs ir pretendents, aktivitāte;
2. Cik aktivs pretendents ir bejs vysa goda laikā;
3. Kaidu rezonansi regionā, vaļstī voi plašuokā mārūgā raisejuse pretendenta darbeiba (kū leluoka, tū viertejams augšuok);
4. Pretendenta snāguma kvalitāte (muokslinīcyskuo, volūdys, publicitatis, aktivitatis i tml.).
5. Pretendenta snāguma ilgtspieja – kaidus pādus nūtikšona, personeiba, aktivitāte pamess godim iz prišku.

**Sasazynuošonai:**

bonuks@rezekne.lv i 64633303